

78^v *A dì 12.* Da matina, reduti li Savii in Collegio, vene sier Alvixe Gradenigo venuto orator di Roma vestito di veludo cremexin-alto e basso, acompagnato da soi parenti, qual è venuto vechio e canuto et stete pocho. Fo rimesso a referir il primo Pregadi et si partì, et da poi:

Veneno li 4 oratori di Roma, primo sier Piero da Pexaro procurator, vestito di veludo paonazo, sier Marco Dandolo dottor et cavalier, di veludo cremexin, sier Alvixe Mozenigo el cavalier, de scarlato, et sier Antonio Zustignan dottor, damaschin cremexin, et steteno in Collegio do hore bone. Referite il Pexaro ch'è il più zovene, e il Mocenigo per esser consier restò in palazo. Li altri veneno zoso.

Da Zara fo lettere di sier Francesco Arimondo conte, et sier Beneto Valier capitano, di 30 April. Come, intendendo turchi haver facto gran butin in certe ville di quel territorio et grandissima preda, portandola via, Zorzi Busichio capo di stratioti li existente ussìte fuora con 40 cavalli solamente et li partì in tre lochi, con tre trombeti, con ordine tutti sonassero a un trato. E cussì feceno per dimostrar erano assai, e visto questo, turchi che conduceano via la preda, si messeno in fuga credendo stratioti esser assai numero; et cussì recuperò esso Busichio la preda, preso 4 turchi vivi et 20 cavalli, e tornò in la terra con vittoria.

Da poi disnar, fo Colegio et li Corectori si reduseno in Gran Consejo aldir quelli voleno aricordar qual cossa. Si dice voleno meter molte corection; altri dicono voler meter il Gran Consejo fazi li 41, zoè li 11 elezino 100, quali siano balotadi in Gran Consejo, di quali rimangi li quaranta uno. Sier Andrea Trivixan el cavalier non è intrato Coretor, licet eri matina fu a Consejo, per esserli venute gote a un piede. Si dice doman non sarà Consejo, ma sarà Pregadi; et il dì de la Senza si farà Consejo per ditti Corectori, perochè dicti Corectori 4 *adhuc* non è in ordine le loro parte.

78^{*} *A dì 13.* La matina la Signoria fe' chiamar Gran Consejo per far tre Inquisitori, in luogo di tre di qual hanno acceptà la scusa, et si reduce poche persone. Io andai, et fono *solum* 4 Procuratori, sier Alvise Pasqualigo, sier Hironimo Justinian, sier Andrea Lion et sier Francesco di Prioli. Et poi Alvise di Piero segretario andò in renga e lexè alcune parte zerecha il far de li Inquisitori, et che si elezino come li Corectori, poi leto quella di far li Corectori, però non possi esser electi Consieri, nè Cai di XL. *Item*, la

parte presa 1520, che li Consieri da basso sia come quelli di sora.

Da poi lexè una parte che meteva i Consieri e Cai di XL, atento sier Marco Antonio Loredan rimasto Inquisitor si habi excusato a la Signoria, non poteva esser balotà per esser Consier da basso. *Item*, sier Daniel Renier, che per esser dil Consejo di X pol refudar ogni cargo, et sier Gasparo Malipiero per esser Governador con pena per la parte ultima non pol esser in uno altro officio con pena; per tanto sia preso che si fazi in loco loro possendo esser electi cadaun, excepto quelli è in li officii continui; con altre clausole, *ut in ea*; la copia sarà scripta qui avanti. Et il Consejo mormorò assai, et lo cridai grandemente, che queste non è scuse di dover esser acceptade, *tamen* non vulsi parlar. Nè fo cazado li parenti, perchè zà la Signoria havia terminato di acetar la scusa. Andò la parte. Ave: 2 non sincere, 266 di sì, 720 di no, et fu preso di no. *Unde* li Consieri rimaseno molti storni e stati assai in consulto.

Et fe' dir a Gasparo di la Vedoa vice canzelier grando, che havendo la Signoria terminà che cadaun di questi tre si baloti separatamente si se dia acceptar la sua scusa ovvero non, *unde* si meterà le parte che se intenderà, et poi Lorenzo Rocha segretario andò in renga et lesse la parte meteva li Consieri e Cai di XL che fosse acetà la dita scusa di sier Marco Antonio Loredan ch'è Consier da basso, e cazado li soi parenti. Ave: 1 non sincera, 148 de sì, 823 di no; et fu preso di no. Et visto li Consieri questo, non volseno meter di altri do per esser più senza alcuna scusa, et fo licentiatò il Consejo; siehè ditti Inquisitori intrerano.

Da poi disnar, fo Gran Consejo a requisition di 79 Corectori 4, però che sier Andrea Trivixan el cavalier per esser amalato non se impazoe, Et fo a Consejo 12 Procuratori, sier Domenego Trivixan, sier Zorzi Corner, sier Andrea Gritti, sier Alvise Pixani, sier Andrea Justinian, sier Piero da cha' da Pexaro, sier Francesco Corner, sier Andrea Lion, sier Marco da Molin, sier Francesco di Prioli, et sier Antonio Mozenigo e sier Andrea Gusoni, qual vol esser drio sier Francesco Corner; il resto di Procuratori non veneno, et li do fo questa matina, sier Alvise Pasqualigo et sier Hironimo Justinian non vene, sier Lorenzo Loredan ha tolto cassia, sier Carlo Morexini et sier Giacomo Soranzo è fuora, il Gabriel amalato, li do Grimani nepoti dil Doxe non vien.

Fu pòsto aduncha per sier Antonio Trun procurator, sier Alvise di Prioli, sier Francesco Bragadin

(1) La carta 77* è bianca.